



Anute di Bertin a i fîs ator pal mont.

Il plui dongje al è in Gjermanie e si fâs viodi pôc, si e no une volte l'an, e ancje in chês volte di premure.

Anute e à une gole mate di viodi i nevôts e cemût che a vegnin sù e par letare i domande dispès a siò fi cualchi fotografie dai fruts.

Ven a stâi che pal so complean al rive un pac da la Gjermanie de bande di siò fi. Ben, tal pac al è un videoregjistradôr e une cassette cul cine dai fruts. Dute contente Anute, che e je inzegnose e di coce fine, e cîr di tacâlu ma nol è nuie di fâ, lis prove dutis ma nol va.

Anute e clame lis babis dal borc, che di solit a san dut. Ma ancje par lôr però la robe e je masse imberdeade.

Tocje rindisi e clamâ Pauli, il tecnic. Malvulintîr, parcè che il "tecnic" al coste e si lu clame nome cuant ca rive la aghe al cûl.

I jentri in cjase e Anute mi spiege la cuistion. "Ai parât dentri la spine da l'argagn ta la curint, come che al è scrit tal biliet di gno fi, po dopo ai metût la cassette ta la sô barconete e l'imprest le à glotude ben. Si è piade ancje une lusute ma ta la television no si viôt nuie. Che al sedi di belzà rot?"

Jo i viôt subit che al mancje il cavo di colegament, il CAVO SCART.

"Anute, nol è rot nuie - i dîs jo - Chi al mancje un cavo, bisugne chi us meti il CAVO SCART".

"A no, pa la monate - e salte sù Anute - no vuei un cavo scart. Jo i pai ce che al è di paiâ, ma

ca mi meti un cavo bon”.

Ridint i spiegji che a si clame propit cussì.

I ai metût ce che al jere di meti e le ai contentade, ma vignint vie mi è parût, che su la storie dal cavo scart che al è bon, no sedi stade masse convinte.

di Pauli Jacuss